

Bulletin

Amptelike nuusbrieff van die Munisipaliteit Overstrand

GEBEURTENISVOL, JA, MAAR OOR DIE ALGEMEEN, HOOGS SUKSESVOL:

2013/14-VAKANSIESEISOEN IN OËNSKOU



Foto: Overstrand Herald

Overstrand het weer eens sy naam as een van Suid-Afrika se gewildste vakansiebestemmings gestand gedoen. Na die mening van die Munisipale Bestuurder, Coenie Groenewald, "kon vakansiegangers nie vir beter weer oor die piekseisoen vra nie".

Waarskynlik weens die goeie weer, rapporteer Cape Whale Coast - Overstrand se amptelike bestemmingbemarkingsagentskap - dat besoekers geneig was om vir langer tydperke te bly, met die meeste toerismeburo's wat rekord-okkupasiesyfers vir die seisoen aangeteken het. Ook van belang is die groot aantal besoekers uit die buiteland, met menige besoeker uit Frankryk, die VK, Duitsland, Nederland, die VSA en Swede wat wyslik die gure weer in die noordelike halfrond vir ons sondeurdrenkte kus verruil het.

Ongelukkig het vyf mense gedurende dié tydperk hulle lewens weens verdinking verloor, onderwyl 'n haai-aanval naby Grotto-strand - gelukkig sonder lewensverlies - vroeg in Desember gerapporteer is.

Op die keper beskou het die uitstekende samewerking tussen wetstoepassingsagente, munisipale personeel, private sekuriteitsmaatskappye en die publiek in die algemeen egter gehelp om oortredings tot die minimum te beperk, wat daarop neerkom dat almal hulle welverdiende blaaskansie in 'n veilige en silwerskoon omgewing kon geniet.

Ondanks die swaar verkeer wat op Overstrand se paaie ervaar is weens die rekordaantal besoekers wat die gebied vanjaar besoek het, het

verkeershoof Rudi Fraser en sy span daarin geslaag om die verkeersdruk met buitengewone gemak te hanteer danksy deeglike voorbereiding en 'n publiek wat bereid was om 'n bietjie meer geduld as gewoonlik te beoefen. Benewens hulpverlening by nege geleenthede wat maar net in en rondom Hermanus aangebied is, het die verkeersafdeling ook 'n handjie daarin gehad om nie minder nie as 517 ongelisensieerde/ongeregistreerde voertuie van Suid-Afrikaanse paaie te verwyder.

Verskeie geringe brande, waarskynlik as gevolg van nalatigheid, is blitsig onder beheer gebring sonder dat groot skade aan fynbos of eiendom aangerig is. Ook hier het die uitstekende samewerking tussen Overstrand se brandweer, die brandweerdienste van die Overberg-distriksmunisipaliteit en spanne van CapeNature en Working for Fire duidelik geblyk.

Burgemeester Nicolette Botha-Guthrie het die gemeenskap en die amptenar, veral diegene wat 'agter die skerms' aan die werk was, vir hulle onderskeie rolle en bydraes tot 'n goeie seisoen bedank.

Om Overstrand se bekendheid te verhoog en punte as 'n gesogte bestemming te verdien, is nie iets wat oornag gebeur nie. Dit is die resultaat van 'n deurlopende proses waar almal hulle daartoe verbind om keer op keer op vorige prestasies te verbeter. En volgens die lof wat ons tot dusver toegeswaai is, is ons beslis goed op pad. Welgedaan almal!

HOOFWEG SE BLAD WORD HERNU, MAAR SAKE VERLOOP SOOS NORMAALWEG

Die hernuwing van die blad van Hermanus se Hoofweg tussen Haweweg en Marinerylaan het middel-Januarie 'n aanvang geneem en beide seksies van die pad sal vir verkeer gesluit wees tot en met die verwagte afhandeling van die projek einde Februarie, mits die weer dit toelaat. Dit beteken dat alhoewel voetgangers steeds beide syaadjies langs Hoofweg kan gebruik, normale verkeer vir die duur van die projek nie toegang tot Hoofweg vergun word nie. Dit sluit die voertuie van verskaffers in wat aflewings in die geaffekteerde seksie van Hoofweg wil doen.

Mike Bartman, adjunk-direkteur: operasionele dienste van Munisipaliteit Overstrand, het weer eens beklemtoon dat verskaffers wat ge-

woonlik in Hoofweg parkeer en aflaai van die aangrensende Hoogstraat of ander omliggende strate soos Lang-, Broad- of Collegestraat vir aflewings gebruik moet maak.

"Ons verkeersafdeling het onderneem om tydens die hernuwing van die blad eeffe tegemoetkomend te wees en sal aflewingsvoertuie akkommodeer in strate wat nie normaalweg vir aflewings in Hoofweg gebruik word nie. Verkeersbeamptes wat die verkeer reël, doen ook 'n beroep op Hermanus se motoriste om hulle samewerking te gee en om bedag te wees op ander padgebruikers tydens hierdie tydperk," het hy bygevoeg. "n Paar spesiale reëlins geld. So, byvoorbeeld, kan toegang na Markstraat, wat

tot die parkeer- en aflewingsarea langs FNB lei, via Marinerylaan verkry word. Omdat dit 'n nou straatjie is, kan dit nie tweerigtingverkeer dra nie, en puntdienste word voorsien om dit makliker te maak om in uit die parkeerarea en Marinerylaan te kom," het Bartman ter afsluiting gesê.

Lede van die publiek wat navrae het, kan Mike Bartman by 028 313 8972, Jaco Smith van die kontrakteurs Zebra Surfacing & Isidima Civils JV by 076 147 8289 of Bertus van Wyk van V&V Raadgewende Ingenieurs by 082 339 0521 skakel. Sake-eienaars langs Hoofweg kan hul navrae rig aan Kees van de Coolwijk - 'n sakevertegenwoordiger wat op die skakelkomitee dien - by FotoFirst in Hoofweg, tel. 082 658 5370.

AANSKOULIKE KLEINMOND! "Een Span, Sewe Uitdagings"

Op Saterdag 11 Januarie 2014 het multisport-atleet Dan Hugo (foto hiernaas) weer eens goud opgeëis by die 12de jaarlikse Totalsports-uitdaging wat deur Liberty Mediese Skema en REHIDRAT® SPORT in Kleinmond aangebied is met 'n indrukwekkende wentyd van 07ure-06minute53sekondes. Heleen Rossouw was die atleet om te wen in die individuele vrouekategorie van hierdie resies met sy sewe dissiplines en gekombineerde afstand van 123.5 km. Sy het die wenstreep in 'n tyd van 08ure59minute09sekondes oorgesteek.

Bradley Weiss en die Bermudaanse driekamp-atleet, Flora Duffy, is as kampioene gekroon in die Totalsports Terra Firma-uitdaging vir individuele mans en vroue. Duffy het die volgende te sê gehad: "Die resies is fantasties, regtig goed georganiseer. Die hele roete is skitterend, asemrowend en pret, 'n unieke kombinasie."



Dan Hugo

Jelaine Action foto

Staan 'n bietjie opsy vir ARGUS hoopvolles Veiligheidswenke vir fietsryers én motoriste

WEES HELDER! WORD GESIEN!

Gebruik ligte. Dra helder klere.

Met die jaarlikse Cape Argus Pick n Pay-fietsstoer minder as 'n maand weg, kan Overstrand se motoriste in die volgende paar weke verhoogde fietsverkeer op die paaie te wagte wees. Gegewe die op- en afdaendes kenmerkend van die paaie rondom Overstrand, is dié gebied 'n gewilde "oefenbaan" vir beide ervare mededingers en diegene wat vir die eerste keer deelneem, dikwels met die uitsluitlike hoop om bloot die wenstreep in een stuk te haal. Verkeershoof, Rudi Fraser, waarsku alle motoriste om daarop bedag te wees dat nie alle fietsryers geoefende ryers is nie; boonop behoort ons nie goedsmoeds te aanvaar dat hulle ons paaie ken nie. "Ons wil 'n beroep op alle motoriste doen om seker te maak dat hulle 'n minimum afstand van 1.5m toelaat wanneer hulle fietsryers verbystek: As daar 'n spasie van 1.5m tussen 'n motor en fiets is, is dit onmoontlik dat die fietsryers getref kan word," sê hy.

Natuurlik moet fietsryers ook hulle deel doen om minder aangename ontmoetings langs die pad te verhoed. Op die webwerf van Pedal Power, 'n professionele vereniging waaraan fietsryers behoort, word verskeie wenke gegee oor hoe fietsryers hul veiligheid langs die pad kan verseker:

- Oefen by die huis hoe om lekplekke op 'n band reg te maak
- Sorg dat jy altyd 'n bandherstel-stel, 'n ekstra binneband, pomp ligters en 'n band byderhand hou
- Wees so sigbaar as moontlik, veral as jy vroegoggend en laatmiddag gaan ry
- Belê in liggies vir jou fiets (wit voor; rooi agter)
- Dra reflekerende bande om jou enkels en kies helder kleure wanneer jy fietsryklere koop
- Dra altyd jou valhelm
- Handskoene is ook 'n goeie idee, want dit sal jou hande beskerm wanneer jy val
- Gehoorsaam die verkeersreëls
- Moet nooit oor rooi verkeersligte of op sypaadjies ry nie
- Hou altyd links van die middellyn
- Wees op die uitkyk vir los sand, water, glas, oliekolle en gruis op die padoppervlak
- Kontroleer altyd jou blindekol voordat jy van rigting verander
- Gebruik die korrekte handseine wanneer jy wil stop of afdraai
- Sorg dat jy altyd genoeg eet- en drinkgoed by jou het
- In geval jy teëspoed langs die pad optel, sorg dat jy identifikasie by jou het sowel as jou mediese besonderhede en die kontakbesonderhede van 'n gesin/familielid

Besoek www.pedalpower.org.za vir nog veiligheidswenke.

BIG BLUES

Skud jou feesvere reg en kom geniet twee dae van manjifieke *rhythm and blues* by Kleinmond se hawe op Vrydag, 28 Februarie en Saterdag, 1 Maart. Piet Botha (foto) is maar een van talle kunstenaars wat gaan optree. Vir besonderhede oor die program en kaartjieverkope, besoek www.bigblues.co.za.

Foto - Jesse Bethany Pearce (Rolling Stone)



GERAT OM JOU RYBEWYS TE BEKOM

HIER'S 'n HANDIGE KONTROLELYS OM DIE WEG TE HELP BAAN

Volgens wet moet alle openbare bestuurspermitte en rybewyse onderskeidelik elke twee of vyf jaar hernieu word. Die meeste mense sien op teen hierdie proses en beskou dit as ingewikkeld en tydrowend - al te meer as jy vir die eerste keer aansoek doen en boonop eers 'n leerlinglisensie moet bekom.

Verkeershoof, Rudi Fraser, wil graag aan almal die versekering bied dat sy afdeling uit hulle pad gaan om te verseker dat dié proses so glad moontlik verloop. En, met 'n tikkie samewerking van die publiek, kan dit boonop in die kortste moontlike tyd afgehandel word. Hy het ook 'n bietjie advies vir jong volwassenes: "Om 'n rybewys te bekom, is 'n groot mylpaal in enige iemand se lewe, en soos dit alle groot prestasies in die lewe betaam, sou my raad wees om dit so gou as moontlik agter die rug te kry."

Voor jy vir jou volgende afspraak met die Verkeersafdeling aanmeld, werk deur hierdie handige kontrolelys om seker te maak jy verstaan hoe die proses werk en dat jy alle nodige dokumente en gelde byderhand het.

AANSOEK OM LEERLINGLISENSIE

1. Bring saam:
 - a. Identiteitsdokument / geldige Suid-Afrikaanse paspoort / verkeersregistersertifikaat
 - b. 2 x ID-foto's
 - c. R68 betaalbaar by aansoek
2. Vul afdelings A, B en D op blou vorm in. (swart pen)
3. Doen aansoek by Kassier 3 of 4.
4. Wag vir oogtoets.
5. Meld weer by Kassier 3 of 4 aan om afspraak te maak.

UITREIK VAN LEERLINGLISENSIE (TOETS GESLAAG)

1. Bring saam:
 - a. Identiteitsdokument / geldige Suid-Afrikaanse paspoort / verkeersregistersertifikaat
 - b. R30
2. Indien 'n duplikaat-leerlinglisensie verlang word, 'n addisionele R33 plus 2 x ID-foto's
2. Meld aan by Kassier 3 of 4.

AANSOEK OM NUWE RYBEWYS (1STE KEER)

1. Bring saam:
 - a. Identiteitsdokument / geldige Suid-Afrikaanse paspoort / verkeersregistersertifikaat
 - b. 2 x ID-foto's
 - c. R200 vir swaar motorvoertuie
 - d. R135 vir ligte motorvoertuie
 - e. R135 vir motorfiets
2. Vul afdelings A, B en D op groen vorm in. (swart pen)
3. Doen aansoek by Kassier 3 of 4.
4. Wag vir oogtoets, vingerafdrukke, ens.
5. Na afhandeling van bovermelde, meld weer by Kassier 3 of 4 aan om 'n afspraak te maak.
6. Indien toets suksesvol is, sal 'n verdere R140 betaalbaar wees vir die uitreiking van 'n nuwe rybewys

Besoek www.overstrand.gov.za vir 'n volledige kontrolelys om jou rybewys te hernu

DUITSE DUO'S TERUG IN OVERSTRAND



Sondagmiddag, 16 Februarie, gaan Peter Bruns (tjello) en Annette Kuttner (klavier) 'n uitvoering in die Auditorium in Hermanus lewer. Die konsert begin om 15:30. Hulle gaan Adagio und Allegro, op. 70 deur Schumann, Sonate pour Piano et Violoncello, op. 65 deur Chopin en Sonate vir Klavier en Tjello, F-majeur, op. 99 deur Brahms speel.



Peter Bruns en
Annette Kuttner

Saterdagmiddag, 8 Maart, gaan klavierduo Genova en Dimitrov die gehoor vermaak met 'n uitvoering op een klavier in die Auditorium. Die konsert begin om 19:00.

Kaartjies kan bespreek word by BELLINI GALLERY in Village Square. Skakel hulle by 028 312 4988. Kaartjies kos R100 (R50 vir studente/skoliers).

Skakel sekretaresse René du Plooy by 082 940 4238 vir verdere navrae.



Genova en Dimitrov